

ECONOMIA

Savognin: la halla da construcziun dalla «Ufferhouse ag» è surdada agl travagl

Betg manc da 40 posts da labour



La direcciun dalla interpresa «Uffer» a Savognin. (da san.) Enrico Uffer, Andrea Janett e James Cristallo.

● **G.N.S. Diesch** meis siva l'amprema badigleida ò l'interpresa «Ufferhouse ag» scumanzo cun la producziun aint igl nov luvratori a Savognin. Per l'economia regionala è la nova halla da gronda impurtanza. Luvro vign cun las pi novas maschinas.

Passa 100 onns è la Scrinareia e Lennareia Uffer a Savognin ancunashainta per ena interpresa fitg seriousa. Avant 16 onns è la firma neida separada an dus parts, la scrinareia e la lennareia. Siva da lò ò Rinaldo Uffer mano angal ple la Lennareia Uffer SA ed igl 2004 surdo l'interpresa agl sies fegl Enrico Uffer. Aint igl decurs digls davos onns è la labour s'augmentada ferm, er cun aveir la firma fitg blera labour ordvart la regiun. Gist an Nagiadegna ò la Lennareia Uffer SA da Savognin sa fatg en bung nom cun luvrar exact e serious. Adegn duple è sa musso tgi igl luvratori dalla firma a Grava era mengia pitschen. Chegl è sto en muteiv, tgi Enrico Uffer è sa decida da biagier ena nova halla da producziun. En ulteriour muteiv è er sto tgi cun la nova maschina «CNC», ena maschina tgi vo sur igl computer, vign produtgia pi speditiv, pi bunmartgea e betg igl davos pi precis. Aint igl luvratori a Grava, tgi ò onns fatg igl sies sarvetsch mantgeva simplamaint igl plaz per chella nova maschina. Uscheia è Enrico Uffer sa decida da biagier davains Savognin en nov luvratori.

Er Seglias è sto an discussiun

Per construeir la nova halla davains Savognin ò igl cumegn gia da far ena midada da zona (zona d'agricultura tar ena zona d'industria). Angal bungs resungs ègl betg do cura tgi igl cumegn ò fatg chella midada da zona. Schi la midada fiss betg gartageda, veva Enrico Uffer l'inteziun da biagier la halla ordvart la regiun. An discussiun stava tranter oter er Seglias. A Savognin restava angal ple igl biro dalla Lennareia Uffer SA e produtgia niva tot ordvart Surses. Er schi blers on l'impressiun tgi la nova halla seia tot oter tgi en bel maletg per la vischnanca, ègl da vaseir pitost igls aspects positivs. Da stad occupescha la Lennareia Uffer SA tuttegna betg manc da 40 omens. Da chels on gist 30 labour sur onn tar Enrico Uffer.

Ena halla cun gleich naturala

La nova halla da producziun dalla Lennareia Uffer SA è construeida, pero betg anc fittada. Detg oter i dat anc ena sagonda etappa, noua tgi vign construa dalla vart dalla veia principala igl center da competenza per tgesas passivas, igls biros e studios per igls ampluias. Digl center da cumpetenza ins vei direct ainten la halla noua tgi vign produtgia. Chegl dat a tots l'invista practica d'ena construcziun energetica ecologica e moderna. Aint igl center da cumpetenzas vignan er coordinadas las lavours dallas treis interpresas: «Ufferhouse ag», «Uffer Holz ag» ed «Uffer Gips ag». Dalla «Uffer Gips ag» cun Reto Simonett alla testa, suonda pi tard en artetgel ainten la Pagina da Surmeir. Chel center duess star an disposiziun a tots



Chegl è igl nov logo dallas treis interpresas dalla firma «Uffer».

chels tgi on interess per tgesas da minergeia e tgesas passivas e per tots chels tgi on igl intent da far ena sanaziun energetica ve digl bietg existent. La gronda part dalla halla è neida construeida da lenn e montos en nias radond 1000 cubics lenn. La halla ò ena lunghezza da 72 m, ena larghezza da 32 m ed ena otezza da 14 m. Igl intern dalla halla è fitg cler e chella gleich ampernevla vign da dafora, graztga allas grondas fenestras. Igl bietg ò custo radond set milliuns e la finanziaziun è succedeida sen basa privata.

800 000.- fr. per la maschina

La nova maschina da producziun «CNC» produtgescha tot tenor las datas tgi vignan dadas aint igl computer. Igl mument succeda chegl anc aint igl biro a Grava,




En gioven team tgi s'occupescha cun la nova maschina siva dalla scolaziun. (da san.) Gian Andri Solèr, magnafatschenta producziun, Sascha Pittet, responsabel per la producziun CNC, Rico Schmid, producziun CNC, Christopher Jaklin, dalla firma «Hundegger Maschinenbau».

chegl anfignen igl onn proxim. La persunga digl rom an chella tgosca è Peter Niederberger. Igl avantatg dalla maschina, tgi ò ena lunghezza da 36 m ed ena larghezza da 4.5 m è, tgi ella produtgescha speditiv. Igl elements da lenn è pussebel da produtgier an ena dimensiun bler pi gronda. Igl costs dalla maschina tgi è navot oter tgi en computer per ena lennareia è 800 000.- fr. Ansomma è igl luvratori indrizzo fitg modern per simplifitgier la producziun. Tranter oter dattigl er en cran mobil tgi penda sot igl plafung sen ena otezza da 9 m.

En gioven team

Igl concept e la filosofia dalla firma «Ufferhouse ag» è ancunashaint ainten igls tschertgels digls legnamers. Uscheia ò Enrico Uffer betg fadeida da catter luvrants. La filosofia d'Enrico Uffer è er da lascher decider igls ampluias scu schlier las lavours da mintga de. Tar l'interpresa «Uffer» portan blers la responsabladad per las lavours e per las prestaziuns. La collaboraziun digl team seia er la basa per motivar e promover igls ampluias tgi seian prontos da surpiglier responsabladad, dei Enrico Uffer. En gioven team motivo seia igl migler fundamaint per exister sen la fiera. Ena interpresa moderna saptega betg angal sa lascher sen igl pa-trung.



Peter Niederberger è igl om digl rom tgi dat aint las datas dalla maschina «CNC».